




LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 1406 vum 22. Oktober 2024 vum honorabelen Deputéierten Här Sven Clement.

1. Wéi ass d'Situatioun zu Lëtzebuerg am Verglach zu de franséischen Zuelen? Wéi vill Prozent vun der lëtzebuergerescher Bevëlkerung leiden un Obesitéit, opgeschlëselt no Alter a sozioekonomeschem Hannergrond?

D'Donnéeën iwwert d'Situatioun zu Lëtzebuerg baséieren op enger europäescher Ëmfro, der European Health Interview Survey (EHIS)¹ fir Erwuessener an op der Etude HBSC (Health Behaviour in School-aged Children)² fir Jonker vun 11 bis 18 Joer. A béiden Ëmfroe gëtt den BMI op Basis vum Gewiicht an der Gréisst, dee Befroter selwer deklaréieren berechent. Zousätzlech erhieft d'Schoulmedizin Donnéeën (gemoossene Donnéeën iwwert Gréisst a Gewiicht) vu Kanner tëscht 4 an 12 Joer.

D'Situatioun zu Lëtzebuerg ass änlech wéi déi a Frankräich. 2019 waren 16,5% vun Erwuessener vun Obesitéit betraff. Dës Zuele sinn a bësse méi héich wéi am Joer 2014 (an zwar 15,6%). Den Undeel u Persounen, déi un Obesitéit leide gëtt mam Alter méi grouss (Grafik 1).



Grafik 1: Undeel vun Erwuessener an der Europäescher Unioun (UE) an zu Lëtzebuerg (GDL), déi un Obesitéit leiden, no Alterskategorie, am Joer 2019.


Laut der Ëmfro vum EHIS, variéiert den Undeel vun Erwuessener mat Obesitéit mam Niveau vun der Ausbildung (wat als Indikateur fir de sozio-ekonomeschen Niveau vun der Bevëlkerung steet). Wat den Niveau vun der Ausbildung méi niddreg ass, wat den Undeel vu fettleibeger Leit méi klëmmt. Bei Leit mat enger Basisausbildung war den Undeel vun Erwuessener mat Obesitéit 28,1% (2019), während dësen nëmmen 9,9% bei Leit mat engem méi héijem Ausbildungsniveau war.

¹ <https://sante.public.lu/fr/publications/e/ehis-obesite-nutrition-tabac-alcool-comparaison-2019.html>

² https://hbcs.uni.lu/fr/?page_id=986#hbcs-lux-tendances-surpoids




Wat d'Bevëlkerung vu Kanner a Jugendlechen ugeet, ass de Verglach mat Frankräich schwéier, well d'Altersgruppen, déi analyséiert goufen, net identesch sinn. Laut Daten aus de schoulmedizinesche Visitten am Fundamental bleift den Undeel vu Kanner vu 4 bis 12 Joer, déi Iwwergewicht /Obesitéit präsentéieren, zimmlech stabil (Grafik 2). Et ass ze beuechten, dass zënter 2020 WHO Wuesstemskurven als Referenz benotzt ginn.



Grafik 2: Iwwergewicht/Obesitéit bei Kanner vu 4-12 Joer (Schoulmedezinesch Daten aus dem Fundamental). D'Donnéeën fir 2020/2021 feelen, wéinst dem zäitweilige Stopp vun der schoulmedezinescher Aktivitéit am Kontext vun der COVID-19 Pandemie.


Et ass net méiglech d'Donnéeën vun der Schoulmedezin mat Informatiounen iwwert de sozio-ekonomeschen Zoustand en Lien ze setzen.

Wat Jugendlecher am Alter tëschent 11-18 Joer ugeet, déi zu Lëtzebuerg an d'Schoul ginn, konstatéiert d'Etude HBSC en Trend zu enger Erhéijung vun Iwwergewicht/Obesitéit. De Prozentsaz klëmmt vu 14% am Joer 2006 op 21% am Joer 2022 (Grafik 3).



Grafik 3: Iwwergewicht/Obesitéit ënner Jugendlechen no Alter

Ofhängeg vum Wuelstandsniveau, dee vun de Jugendlechen empfonnt gëtt, beobachte mir datt wann dëse méi niddereg ass, de Prozentsaz vun Iwwergewicht/Obesitéit bei Jugendlechen eropgeet. Dëse klëmmt vun 22% am Joer 2006 op 31% am Joer 2022 (Grafik 4).



Grafik 4: Iwwergewicht/Obesitéit bei Jugendlechen no empfonnenen Wuelstandsniveau



2. Wéi eng Moossname goufen a ginn a Lëtzebuerg geholl, fir d'Obesitéit ze bekämpfen a virzebeugen, besonnesch bei Kanner a Jugendlechen?

Den interministérielle Programm „Gesond iessen, Méi beweegen“ (GIMB) huet als Ziel d'Promotioun vun enger equilibréierter Ernierung an enger regelméisseger Beweegung fir d'ganz Bevëlkerung. Dëse Programm gëtt regelméisseg evaluéiert an adaptéiert. De Réseau de compétences diabète et obésité morbide de l'enfant an de Réseau de compétences diabète et obésité morbide de l'adulte (autoriséiert an amgaangen en place gesat ze ginn) wäerten eng zousätzlech Ënnerstëtzung bréngen fir d'Obesitéit.

3. A wéi enge staatlechen Datebanke ginn den Index de Masse Corporelle (IMC) an aner Donnéeën mat Bezuch op d'Gesondheet gespäichert? Wéi laang ginn dës Donnéeën gehal?

Donnéeën iwwert den IMC (an zwar d'Gewicht an d'Héicht) aus der Schoulmedezin gi bei der Direction de la santé, der Ligue médico-sociale an de Gemengen déi e schoulmedezinesche Service hu gespäichert. Dës Donnéeën gi während enger Periode vun 10 Joer ab dem Enn vun der Scolaritéit oder dem Austrëtt vum Lëtzebuerger Schoulsystem gehalen.

4. Gëtt et eng Vernetzung tëscht de verschiddenen Datebanken, wéi zum Beispill dem Medico Sportif, der Médecine au Travail an anere medezineschen Institutiounen? Falls jo, wéi gëtt de Datschutz dobäi garantéiert?

Et gëtt keng Vernetzung tëscht de verschiddenen Datebanken.

5. Wéi ginn dës Donnéeën aktuell genotzt? Gëtt et Pläng, fir dës Donnéeën am Kader vun der Preventioun an der ëffentlecher Gesondheitspolitik ze benotzen? Wa jo, wéi soll dat ausgesinn?

D'Donnéeën gi benotzt fir d'Prioritéiten am Domaine vun der ëffentlecher Gesondheet festzeleeën an Aktiounen ze plangen.

6. Gëtt et Pläng, fir d'Obesitéit als chronesch Krankheet unzeerkennen, änlech wéi et an anere Länner diskutéiert gëtt? Wéi eng Konsequenze kéint dat fir d'Gesondheitsversuergung zu Lëtzebuerg hunn?

Pläng fir d'Obesitéit als chronesch Krankheet unzeerkennen sinn an der Diskussioun. Dëst kann den éischte Schrëtt si fir eng besser Versuergung a manner Stigmatisatioun. Dës ass en ligne mat den Objektivier vun de Projete vun de réseaux de compétences fir Obesitéit bei Kanner an Erwuessenen.

Lëtzebuerg, den 28. November 2024

D'Ministesch fir Gesondheet
a sozial Sécherheet

(s.) Martine Deprez